

HINNA LEH THINA



Simmun 3:
January 17, 2026




“Ijieh in em
itile keima
din hin chu
Christa ahin,
thi chu
hamphatna
ahi.”

Philippi 1:21

Lungsietna bei Nero'n achungthu atan ding Paul in angatho ahi tai. Amalam khankho ding Caesar lungphut a kingai abang tai.

Ahin Nero khut a amalam khankho kingai tah mong ahilou Paul in ahekeu keuve; Pathien khut a um jo ahibouve. Hijieh chun houbung mite'n ataopih jal un jalenna amukit tei ding atahsan e.

Hinlah, (suongkul ataan bang a) athi jal a gospel natcho hung machal ding ahi leh Christa dia ahinna pieh ding anuom in ahi.



Christa dia hin ding ham, thi ding ham?


- Paul in Christa achoi-at (Philippi 1:10-20, 25-26)
- Christa dia hin ding ham, thi ding ham? (Philippi 1:21-22)
- Paul in lampi kika ni ase (Philippi 1:23-24)



Christa dia hin ding kiti hi ipi tina hin tem?

- Nun le khan Christa thupha toh kituosah ding (Philippi 1:27a)
- Gospel dia lungkhat a galsat (Philippi 1:27b-30)

CHRISTA DIA
HIN DING
HAM, THI
DING HAM?




PAUL IN CHRISTA ACHOI-AT

"Kadei gil pen le kakinepna chu...a-itih phat hihen tutah jieng hijongle hakat tah a kapan ngam a, hinna hihen thina hijongle katahsa pumpi a hi Christa choiatna ding hi ahipen'e." (Philippi 1:20)




Paul in tamveipi bolgim a chu akipapi'n ahi (Col. 1:24a; 2 Cor. 11:23-27). Suhgimna achan akipapi ahipon, Christa ding jal a athuohgim a, houbung machalna aso chu akipapi ahijo'i (Col. 1:24b; 2 Cor. 11:28).

Athuohgimna a Christa bang a apan a, thina gei a Christa khonung ajui jou jieh in Paul in Christa hatah in achoi-at in ahi (Col. 1:20).



Philippi mite alekhathot a chun Paul in hiche pet a thina atuokhah leh Christa dia phachuom behseh hilouva, chusang chun houbung mite taona jal leh Lhagao Thieng natcho jal a suongkul akuon ahung jalen a, thupha asap jom thei ding atahsan joh kichieh tah in ase i. (Phil. 1:19, 25-26).

Hiche khang mite khangitlouna asan behseh jieh chun Christa bang a hin ding chu Christa bang a bolgim a um a, Ama thi bang a thi ding tina jong ahung hi. (2 Tim. 3:12).



CHRISTA DIA HIN DING HAM, THI DING HAM?

"Ijeh in em itile keima din hin chu Christa ahin, thi chu hamphatna ahi." (Philippi 1:21)



Thuohgimna jouse hung umdoh hi van le lei, mun jouse, a se le pha, Satan le Christa, kidouna tuni gei a aum jiehi ahi


Hiche hi lhagao gal ahin, lhagao galvon a sat ding ahi. Melmapa mite chun Christiante thilthet tah tah ho (jou, kidem, kinah, etc) galdouna'n amang un ahi.



Eihon vang thudih leh dihtah a thilbol chu galvon in imang uve (2 Cor. 6:4-7). Hichu "kulpi suhsiet theina galvon" ngen ahi (2 Cor. 10:3-5).

Ahin, kidouna a chondih khat in thina atuo tieng ipi thilsuoh um ji em? Paul in vang hitobang chu hamphatna ahi ati (Phil. 1:21).

Christa a kitah tah a um eiho din vang thina hin melmapa khut sophah khelpeh ei lhut ji un, bolgimna ei peldoh sah ji tauve (Pr. 14:32; Is. 57:1).



PAUL IN LAMPI KIKA NI ASEI

"Ni kah a lhen joh ding helouva moh lunggim kahi, kiteldoh a Christa to umkhom ding kadei lhev jieng e, hichu kei dinga gamcheng a phajo ding ahi. Ahinla tahsaphe a kahin nah lai ding hi nangho dia khohjo nalai ahi." (Philippi 1:23-24)

Paul in lhenkah ding ahepon, ani in adei gel e (Phil. 1:23-24):

Kiteldoh ding

**Christa toh umkho
ding**

Hin nahlai ding


**Houbung dia phachuom
ding**

Hiche lai thusut hi mun dang toh simthalou in, Paul in thi thi a van a kaltouva Christa toh umkhom ngal ding ati abang e, Bible in hiti a chu ahilou vang in (Eccl. 9:5; Ps. 6:5).

Hiche Philippi mite alekhathot ma a chun Paul in Christa toh umkhom theina din thokitna nikho anga din ase in ahi (Phil. 3:8-11).

Mundang khat a chun, Paul in hiche tahsa hi puonbuh sesa (athi) toh atekah in, thitheilouna ahin kivon ding ahi ati (2 Cor. 5:1-4). Ahin, hiche kivonna chu Second Coming tieng le bou chang ding, athi jou jouva guilhung ding ahipoi ati (1 Cor. 15:42, 51-54).





CHRISTA DIA
HIN DING KITI
HI IPI TINA
HIN TEM?

NUN LE KHAN CHRISTA THUPHA TOH KITUOSAH DING

"Nanun nakhan, nakhosah dol u chu Christa Kipana Thupha to kituoh pou pou hen." (Philippi 1:27b)

"Nanun nakhan" kiti hi Greek thucheng *politeuomai* kuon a kiledoh, "gamsungmi bang a khosah ding" tina ahi. Paul in Philippi mite (eiho jieng jong) vangam mite chonbang a khosa dia adeisah ahi (Phil . 3:20).

Muolchung a athuhil chun Jesu'n vangammi ho chonchan ding dan ahil e.

Achomlam a hiti seithei hinte: thildih bol ding, tantih neilouva lungsiet umсах ding, kineosah nun nemtah a um ding (Micah 6:8).

Paul in houbung pumkhat ding ase i tieng hiche thumop hin apatna abolji e.

Houbung kibungkhenna hi hoithona leh khat chung a umchan phalou kibolho a kuon ahi ahe'i. Hijieh chun inun ikhan u ja um tah ahi ding aseikhoh ahi.



GOSPEL DIA LUNGKhat A GALSAT

“Keima nahieng uva hung ing, hung mu’n, mu hih jong leng, Kipana Thupha tahsan lam a lungkhat tah a napankhom uva, Lhagao khat a nadinkhom jing u...” (Philippi 1:27a)



Chondih leh thudih tah hi vang a kidoupi melma neilou ding tina ahidieh poi (Phil. 1:30). Khuti malah, Job bang a Pathien in “*Ama bang a kitah le pha leisiet chung a midang aum poi*” (Job 1:8) atipa ngel jong thuohlel um tah tampi akimaitopi’n ahi, melmapa Satan natos jal in.



Hiche galpi isat jing lai u hin kipumkhatna hi ngai poimo tah chu ahi. Paul in pankhom, dinkhom a hiche gal isat diuvin ei tiem uve (Phil. 1:27a).

Lungtup kibang ding, taona a hapan ding, Pathien Thu a khantou jing ding ahi (Eph. 6:18; Phil. 2:16).

Ase toh ikidinte tieng u leh eidouva pangho jieh a lungneo lou ding ahi (Phil. 1:28). Satan chu kidoupi gallelsa ahi ti geldoh jing ute; ajieh chu Christa’n thingpel a galjona aneisa ahi tai (Luke 10:18; Col. 2:15).



“Pakai huonlei a kum ijat um ah ihiu hitam? Ipupa diu ga phachuom ijat ipuohpih tah um? Pathien mit in giltah a ijakai avetchil jing ahin, hichu iti ikimaituopi diu ham? Ja-umna, ngailut, kineosah, Pathien dia dettah ihina ho uva khangtou jing ihi nah um? Pathien hepina ichan kipana a lethuh ding igelji nah um? Ivellah a mite phatthei chansah ding igel ji nah um?

Insung jieng a jong Christa chonchan itho ji nah um? Pathien Thu ichate u iseipih ji nah um, Pathien natoh kidang ho ihilson ji nah um? Christian khat chu mipha tah ahina leh thilpha abolna a Christa dinmun alo ahi. Chutieng hinkho chu gimnam tuitah kilhut bang ding, chonchan vethoi tah hung kilang ding, Pathien cha ahi leh van goulo ding khat ahi muthei a hung um ding ahi.”

EGW (You Shall Receive Power, December 10)